

Na osnovu Zakona o udruženjima i fondacijama BiH (Sl. glasilo br. 32/01.), Skupština Udruženja «Za prevenciju ovisnosti – NARKO-NE», na zasjedanju održanom 2. marta 2002. godine u Sarajevu, donosi

S T A T U T UDRUŽENJA ZA PREVENCIJU OVISNOSTI – NARKO-NE

I. OSNOVNE ODREDBE

Članak 1.

NARKO-NE - udruženje za prevenciju ovisnosti je pravni sljednik udruženja građana «Za prevenciju ovisnosti-WHY». Djelovat će u interesu i potreba građana na području cijele Bosne i Hercegovine u cilju zaštite i unapređenja njihova mentalnog i fizičkog zdravlja od sve izraženije narkomanijske ugroženosti.

Udruženje NARKO-NE djeluje prema međunarodnim standardima suzbijanja narkomanije. Prevencija ovisnosti uključuje tri područja: Primarna prevencija obuhvata sve mjere sprečavanja početka konzumiranja opojnih sredstava. Sekundarna prevencija je namjenjena osobama sa problematičnim konzumiranjem. Tercijarna prevencija sadržava sve potporne mjere za ovisnike: fizičko i psihičko odvikavanje, psihoterapija i smanjivanje štete.

Udruženje također prati aktualnu socijalnu problematiku i organizira odgovarajuće programe i izvan područja prevencije ovisnosti, kao što su: pomoć žrtvama rata i nasilja, djeci, starijim osobama, beskućnicima, itd.

Članak 2.

Ovim Statutom reguliraju se odredbe o nazivu, sjedištu i području djelovanja Udruženja građana: o zastupanju, o ciljevima i programskoj djelatnosti kojom se ostvaruju ciljevi, o ostvarivanju javnosti rada Udruženja građana, o članstvu i članarini, pravima, dužnostima i odgovornostima članova, o tijelima Udruženja, njihovom sastavu, ovlastima, načinu odlučivanja, uvjetima i načinu izbora i opoziva, trajanju mandata, o pravnom statusu, pečatu, znaku Udruženja građana, o imovini i raspolaganju s mogućom dobiti, načinu stjecanja imovine, prestanku, te postupku s imovinom u slučaju prestanka rada Udruženja.

Članak 3.

Puni naziv je: **Udruženje za prevenciju ovisnosti – NARKO-NE**
Удружење за превенцију овисности – НАРКО-НЕ
Udruga za prevenciju ovisnosti – NARKO-NE

Skraćeni naziv organizacije je: **NARKO-NE**
НАРКО-НЕ
NARKO-NE

Sjedište Udruženje je: Sarajevo, Zagrebačka 18.

Udruženje djeluje na području Bosne i Hercegovine.

Članak 4.

Udruženje ima svojstvo pravnog lica sa pravima, dužnostima i odgovornostima koje proizlaze iz Ustava, Zakona, ovog Statuta i drugih propisa, te međunarodnih standarda koji se odnose na nevladine organizacije (NVO).

Udruženje je nevladina, nestranačka i neprofitna organizacija.

Članak 5.

Udruženje ima znak i logotip.

Znak i logotip čine crna slova na bijeloj podlozi sa stiliziranim slovom O, u znaku sunca, u okviru naziva NARKO-NE.

Članak 6.

Udruženje ima pečat.

Pečat Udruženja je četverokutnog oblika, dimenzija 60 x 20 mm i istog je sadržaja i stilizacije kao i logotip sa dopunom adrese i sjedišta Udruženja.

II. PREDSTAVLJANJE I ZASTUPANJE

Članak 7.

Rad Udruženja je nezavisan i javan, otvoren i dostupan ispitivanju od strane njegovih donatora. Udruženje o svom radu može izdavati publikacije, biltene, saopćenja ili osnivati stalna sredstva informiranja.

Javnost rada Udruženja, te obavještavanje javnosti ostvaruje se: omogućavanjem predstavnicima medija da prisustvuju sjednicama i sastancima Udruženja, obavještavanjem sredstava javnog priopćavanja o bitnim događajima iz rada Udruženja i drugim vidovima suradnje na međunarodnoj, državnoj i lokalnoj razini.

Udruženje u pravnom prometu zastupa i predstavlja predsjednik Udruženja u okviru svojih nadležnosti utvrđenih ovim Statutom i općim aktima.

U slučaju odsutnosti ili spriječenosti predsjednika, Udruženje zastupa njegov zamjenik.

Udruženje u pojedinim slučajevima može zastupati izvršni direktor ili punomoćnik prema pismenoj punomoći koju mu izdaje predsjednik Skupštine.

NASTUPANJE U PRAVNOM PROMETU

Članak 8.

Udruženje u pravnom prometu nastupa u svoje ime i za svoj račun.

Udruženje za svoje obveze odgovara svojom imovinom. Udruženje ne odgovara za obveze drugih subjekata.

Članak 9.

Udruženje se može udruživati i u druge saveze i organizacije.

U savezima i organizacijama Udruženje zastupaju i predstavljaju osobe koje ga inače zastupaju, te druge osobe prema odluci tijela upravljanja.

Udruženje može osnivati svoje urede na nivou cijele Bosne i Hercegovine.

Udruženje se može udruživati i u međunarodne organizacije i udruženja.

Udruženje će u svom radu ostvarivati suradnju i s drugim udrugama i organizacijama.

Članak 10.

Udruženje građana NARKO-NE može biti osnivač javnih ustanova socijalne skrbi, sukladno važećim zakonima i propisima i na temelju odobrenja Ministarstva rada i socijalne skrbi entiteta BiH u kojem se osniva.

Udruženje će ostvarivati vlastite projekte za primarnu, sekundarnu i tercijarnu prevenciju.

Odluku o osnivanju donosi Skupština.

III. CILJEVI, ZADACI I DJELATNOSTI UDRUGE

Članak 11.

Ciljevi Udruženja građana su:

- Pospješivanje životnih uvjeta i odgoja, koji će motivirati mlade da se odluče za život bez droge;
- Istovremeno bezuvjetna pomoć ljudima, koji zbog svoje ovisnosti trpe zdravstveno i mentalno i koji žive na rubu društva ili koji su čak iz njega isključeni.

Udruženje može utvrditi i druge ciljeve i zadatke na planu zadovoljavanja socijalnih potreba (primjerice rad sa žrtvama rata i nasilja, beskućnici itd.), te u tu svrhu osnivati druge domove socijalne skrbi.

Članak 12.

U ostvarivanju svojih ciljeva i zadataka Udruženje obavlja slijedeće djelatnosti i poslove:

- zalaže se za stalno i rasprostranjeno provođenje preventivne zaštite djece i mladih od ovisnosti,
- vodi, posreduje, savjetuje i evaluira projekte za prevenciju tj. za sprečavanje problema s drogama i njihovim posljedicama u institucijama i organizacijama (škole, omladinske centre itd.)
- angažira roditelje djece i mladih visokog rizika, stručne i ugledne ličnosti da djeluju preventivno u svome okruženju,
- izdaje knjige, časopise i druge publikacije: organizira izložbe i javne priredbe; a sve u svrhu prevencije ovisnosti i njezinih posljedica i osiguravanja sredstava za rad udruge,
- zalaže se za aktivnosti usmjerene na formiranje centara za odvikavanje od ovisnosti,
- surađuje sa državnim tijelima, omladinskim organizacijama koje potiču dobrovoljni rad u školama i izvan škola, znanstvenim i drugim institucijama koje su zadužene i zainteresirane za prevenciju ovisnosti i njezinih posljedica: zdravstvo, prosvjeta i kultura, mediji, pravosuđe, organi MUP-a, sportske udruge i drugi subjekti koji ostvaruju šire kontakte sa ugroženom populacijom,
- surađuje sa međunarodnim institucijama i drugim organizacijama koje se bave istim ili sličnim aktivnostima
- prati stručnu literaturu i primjenjuje saznanja na planu svih vrsta prevencije
- uvodi i nove programe u skladu s potrebama i kretanjima u društvu.

IV. SREDSTVA ZA RAD I NAČIN RADA

Članak 13.

Imovinu Udruženja čine sredstva koju članovi Udruženja ili druge osobe, pojedinci ili organizacije, unesu u Udruženje

Imovinu Udruženja čine:

- novčana sredstva,
- pokretne stvari,
- nekretnine,
- prava i obveze Udruženja.

Udruženje osigurava potrebna sredstva za svoj rad iz:

- članarina
- sredstava proračuna države, entiteta, kantona/županija, gradova, općina itd.,
- sredstava sponzorstva i donacija,
- dobiti preduzeća čije vlasnik ovo udruženje
- drugih izvora

u skladu sa zakonom.

Udruženje može u skladu sa pozitivnim propisima biti osnivač privrednog subjekta. Dobit stečena djelatnošću koristi se za ostvarivanje programa Udruženja.

U slučaju prestanka Udruženja, nakon namirenja vjerovnika i troškova sudskog i drugih postupaka, imovina se ima predati Humanitarno-karitativnoj organizaciji Kruh svetog Ante, Aleja Bosne Srebrene 111, Sarajevo, pod čijim okriljem udruženje i djeluje.

Članak 14.

Predsjednik, izvršni direktor i Upravni odbor Udruženja upravljaju imovinom i donose finansijske planove i odluke.

Članak 15.

Udruženje je jezgro aktivnosti putem kojih njezini kolektivni i individualni članovi, suradnici i prijatelji na smišljen, organiziran i razrađen način ciljano djeluju na predupređivanju pojave i širenja ovisnosti, oslanjajući se na združene ili zainteresirane organizacije i građane. Udruženje animira, okuplja, upućuje, usmjerava i potiče sve one koji mogu doprinijeti da se neposredno, kompetentno, efikasno i trajno radi na primarnoj, sekundarnoj i tercijarnoj prevenciji ovisnosti. Posebnu pažnju Udruženje pridaje sadržajima i efektima svoga rada, sa što višim stupnjem stručnosti, poduzetnosti i istrajnosti, bez suvišnih formalnosti.

Članak 16.

Stajališta i odluke Skupštine Udruženja putokaz su za njezine izvršne organe, radna tijela, programske timove i sve druge članove i suradnike. Pripremanje i provođenje odgovarajućih djelatnosti ostvaruje se kroz efikasno organiziranje i suučesništvo svih djelatnika, uz što veću uštedu vremena, kako bi i osobe veoma zaokupljene svojim redovnim obvezama mogle uključiti se i dati doprinos cjelovitosti, kvalitetu i efektu pojedinih akcija.

Članak 17.

Udruženje visoko uvažava djelovanje svih subjekata iz područja rada srodnih, sličnih ili komplementarnih institucija i udruženja građana i nastoji sa njima što neposrednije surađivati, jer je to jedan od presudnih činilaca za uspješan rad Udruženja. U tom smislu za Udruženje poseban značaj imaju njegovi pokrovitelji i donatori.

Imajući u vidu opći značaj i potrebu zaštite od narkomanije, Udruženje potiče osnivanje sličnih Udruženja u drugim sredinama i sa njima se može udruživati u saveze ili na sličan način ostvarivati suradnju u svrhu ostvarivanja svojih ciljeva. U tom smislu Udruženje može u zainteresiranim sredinama osnivati urede koji su dio njegove strukture, ali ti uredi ne mogu imati status pravnog lica.

Udruženje može biti član odgovarajućih međunarodnih organizacija ili udruga koje se bave istim ili sličnim djelatnostima, ukoliko djelatnosti tih organizacija-udruženja nije u suprotnosti sa Ustavom i zakonom, njegovim programskim opredjeljenjima i međunarodnim standardima za NVO.

Članak 18.

Članovi Udruženja, njegovi pokrovitelji i donatori, pojedinci, službe i organizacije suradnici, kao simpatizeri Udruženja biće na pogodan način informirani o predviđenim i ostvarenim aktivnostima i u njih uključivani prema afinitetima i interesima.

Članak 19.

Udruženje je otvoreno za sve prijedloge, mišljenja i primjedbe o svom radu i razmotrit će ih sa posebnom pažnjom uz povratnu informaciju.

Članak 20.

Svaki građanin države Bosne i Hercegovine i stranac sa urednom boravišnom dozvolom, ukoliko zato ne postoje zapreke, može se učlaniti u Udruženje pod jednakim uvjetima, u skladu sa Statutom i programskim ciljevima, bez obzira na etničku i vjersku pripadnost, političko i drugo uvjerenje, socijalno porijeklo i slična svojstva.

Građanin će se upisati u evidenciju kao član Udruženja, ako ispunjava slijedeće uvjete:

- izrazi želju da postane član, te potpiše pristupnicu,
- potpiše izjavu da prihvata Statut i ciljeve Udruženja,
- spreman/na dobrovoljni rad u organizaciji

Udruženje može imati i počasne članove, a o čemu odluku donosi Skupština.

Pomoćnik predsjednika vodi popis članova Udruženja.

Udruženje će u svojim aktivnostima poštivati dostojanstvo, historiju, religiju, kulturu i sve druge vrijednosti svojih članova.

Članak 21.

Dužnosti člana Udruženja su:

- da sudjeluje u radu na realizaciji programa Udruženja
- da radi u skladu sa Statutom, te drugim odlukama Udruženja,
- da je spreman za dobrovoljni rad

Članak 22.

Prava člana Udruženja su:

- da bira i da bude biran u tijela Udruženja,
- da sudjeluje u radu i aktivnostima za ostvarivanje ciljeva i zadataka Udruženja,

- da bude pravovremeno obaviješten o bitnim događajima vezanim za rad Udruženja.

Članak 23.

Članstvo u Udruženju prestaje:

- pismenom izjavom člana da istupa iz Udruženja,
- isključenjem po odluci nadležnog tijela zbog stegovne povrjede,
- nespremnost za dobrovoljni rad u razdoblju od 12 mjeseci,
- smrću člana,
- prestankom rada Udruženja.

V. TIJELA UPRAVLJANJA I DRUGA TIJELA

Članak 24.

Tijela Udruženja su :

- Skupština,
- Upravni odbor,
- Nadzorni odbor i
- Stručni savjet.

SKUPŠTINA UDRUŽENJA GRAĐANA

Članak 25.

Skupština je najviše tijelo koje upravlja Udruženjem

Skupštinu sačinjava svi članovi Udruženja.

Skupština pravovaljano zasjeda, te donosi odluke kada istoj prisustvuje natpolovična većina ukupnog broja članova. Ukoliko se broj članova Udruženja poveća iznad 60, Skupština Udruženja se može sazvati na predstavničkom principu, a o čemu odluku donosi Upravni odbor.

Članak 26.

Sjednice skupštine mogu biti:

- redovne, koje se održavaju najmanje jedanput godišnje,
- izborne, koje se održavaju svake treće godine,
- izvanredne, odnosno tematske, koje se održavaju po potrebi.

Članak 27.

Odluku o sazivanju Skupštine donosi Upravni odbor i predsjedavajući Skupštine.

Članak 28.

Skupština obavlja slijedeće poslove:

- usvaja Statut, te njegove izmjene i dopune,
- donosi program rada
- donosi odluke o osnivanju javnih ustanova-domova socijalne skrbi,

- usvaja godišnji izvještaj o radu i završni račun,
- bira i razrješava Upravni odbor, druga tijela predviđena Statutom, te predsjedavajućeg Skupštine, predsjednika Udruženja i njegova zamjenika,
- kontrolira i razmatra rad Upravnog odbora,
- donosi odluku o prestanku Udruženja,
- obavlja i druge poslove predviđene zakonom i Statutom.

Članak 29.

Članovi Skupštine odlučuju javnim glasovanjem, a odluke se donose natpolovičnom većinom nazočnih članova.

Za punovažan rad Skupštine potrebna je prosta većina od nazočnih najmanje 30 članova Udruženja.

Članak 30.

Skupština bira predsjedavajućeg Skupštine čiji mandat traje 3 godine, sa mogućnošću reizbora.

Predsjedavajući Skupštine rukovodi radom Skupštine uz pomoć radnog predsjedništva.

PREDSJEDNIK UDRUŽENJA

Članak 31.

Predsjednika i zamjenika predsjednika Udruženja bira Skupština na razdoblje od tri godine i mogu biti ponovno birani bez ograničenja. Predsjednik i zamjenik predsjednika Udruženja ujedno su i predsjednik i zamjenik predsjednika Skupštine i Upravnog odbora.

Predsjednik Udruženja u okviru svojih ovlaštenja obavlja slijedeće poslove:

- saziva sjednice i rukovodi radom Skupštine i Upravnog odbora,
- zastupa i predstavlja Udruženje u odnosima sa drugim subjektima u zemlji i inozemstvu
- zajedno sa Upravnim odborom predlaže osnovne pravce politike Udruženja,
- obavlja i druge poslove utvrđene Statutom i odlukama Udruženja,
- dužan je sazvati Skupštinu na zahtjev Upravnog odbora, Nadzornog odbora, te na zahtjev najmanje 10 članova Udruženja,
- na redovnoj sjednici podnosi Skupštini izvještaj o radu i zaključni račun.

Predsjednika u odsutnosti zamjenjuje zamjenik predsjednika. U slučaju iznenadne smrti predsjednika ili njegove teške bolesti njegovo mjesto zauzima zamjenik predsjednika do izbora novog predsjednika.

UPRAVNI ODBOR

Članak 32.

Upravni odbor Udruženja je tijelo upravljanja Udruženjem između dvije sjednice Skupštine, a bira se na izbornoj sjednici Skupštine na razdoblje od tri godine, te može biti ponovno biran bez ograničenja.

Upravni odbor ima 7 članova, od kojih su 5 birana i 2 po funkciji.

Mandat članova Upravnog odbora traje tri godine sa mogućnošću reizbora.

Članak 33.

Upravni odbor je izvršno tijelo Skupštine, te provodi zaključke sa sjednica Skupštine, a samostalno odlučuje o:

- provedbi programa rada,
- osnivanju podružnica,
- o imenovanju izvršnog direktora Udruženja,
- o imenovanju Stručnog savjeta Udruženja,
- unutarnjem ustrojstvu, sistematizaciji poslova i zadataka u stručnoj službi Udruženja,
- potrebi angažiranja vanjskih suradnika i o profesionalnom obavljanju pojedinih poslova,
- o izboru i razrješavanju pomoćnih radnih tijela,
- o organiziranju poslova i djelatnosti Udruženja,
- daje suglasnost na odluke predsjednika o raspolaganju imovinom,
- o visini članarina,
- obavlja sve tekuće poslove Skupštine koji nisu stavljani u nadležnost Skupštine.

Upravni odbor sastaje se po potrebi, a najmanje jedanput u šest mjeseci. Za svoj rad Upravni odbor odgovara Skupštini Udruženja. Skupština može razriješiti i prije isteka vremena na koje su izabrani Upravni odbor i Predsjednika, ako prekorače svoja ovlaštenja ili ne izvršavaju savjesno povjerene obveze.

Ako Skupština razriješiti cijeli Upravni odbor, bira se novi s punim mandatom, a ako razriješiti pojedine članove Upravnog odbora, Skupština bira nove do isteka mandata postojećeg Upravnog odbora.

Članovi Upravnog odbora su volonteri i nemaju nikakvih prinadležnosti, izravne i neizravne koristi koja proizlazi iz njihovog rada i djelovanja u Upravnom odboru Udruženja.

NADZORNI ODBOR

Članak 34.

Nadzorni odbor se sastoji od predsjednika i dva člana koje bira Skupština na razdoblje od tri godine, te može biti ponovno biran bez ograničenja.

Član Nadzornog odbora ne može biti član Upravnog odbora, niti predsjednik Skupštine Udruženja, niti izvršni direktor Udruženja.

Nadzorni odbor prati ostvarivanje programa rada, financijsko poslovanje rada drugih tijela, te pridržavanje Statuta i drugih akata Udruženja.

Na zahtjev Nadzornog odbora sva druga tijela Udruženja dužna su mu dostaviti potrebne informacije i obrazloženja.

Ukoliko utvrdi nepravilnosti, Nadzorni odbor će upozoriti nadležno tijelo da ispravi pogrešku, odnosno poduzeti druge potrebne radnje radi ispravljanja nezakonitosti.

Za svoj rad Nadzorni odbor odgovoran je Skupštini Udruženja.

STEGOVNE MJERE

Članak 35.

Nadzorni odbor je nadležan i za odlučivanje o stegovnoj odgovornosti članova Udruženja.

Stegovne povrede su:

- nepridržavanje Statuta, drugih općih akata i odluka Udruženja,
- neizvršavanje odluka i zaključaka tijela Udruženja,
- postupanje suprotno interesima Udruženja,
- postupanja kojima se nanosi šteta ugledu Udruženja.

Stegovnu prijavu može podnijeti svaki član skupštine u roku 15 dana od dana saznanja o eventualnoj povredi.

Nadzorni odbor pokreće stegovni postupak u roku od 30 dana od saznanja, odnosno od dana zaprimanja prijave.

Nadzorni odbor po podnesenoj stegovnoj prijavi mora dati mogućnost članu Udruženja, koji se tereti za stegovnu povredu, da se izjasni o navodima prijave.

Nadzorni odbor, kada raspravlja o stegovnoj odgovornosti člana, može:

- odbaciti stegovnu prijavu zbog protoka roka za vođenje stegovnog postupka,
- odbiti stegovnu prijavu kao neosnovanu,
- proglasiti odgovornim člana koji se tereti za počinjenu stegovnu povredu.

Stegovne mjere su:

- ukor,
- ukor pred isključenje,
- isključenje iz članstva u Udruženju.

Žalba na izrečenu stegovnu mjeru podnosi se Skupštini u roku od 8 dana nakon uručenja odluke Nadzornog odbora.

Odluka Skupštine je konačna.

Nadzorni odbor o izrečenim stegovnim mjerama na koje nije upućena žalba izvješćuje Skupštinu na prvoj slijedećoj sjednici.

STRUČNI SAVJET UDRUŽENJA

Članak 36.

Stručni savjet Udruženja imenuje Upravni odbor. Može brojati od 3 do 7 članova.

Stručni savjet svojim stručnim radom i pomoći pospješuje rad Udruženja. Članovi Stručnog savjeta Udruženja rade na volonterskoj osnovi.

IZVRŠNI DIREKTOR

Članak 37.

Udruženje ima izvršnog direktora kojeg imenuje Upravni odbor na tri godine, sa mogućnošću reimenovanja. Izvršni direktor ima slijedeća prava i obveze:

- stara se o odvijanju rada Udruženja u skladu sa pozitivnim zakonskim propisima, Statutom, odlukama Skupštine, odlukama i zaključcima Upravnog odbora, kao i međunarodnim standardima za NVO,
- pomaže predsjedniku Udruženja i Upravnog odbora u obavljanju njihovih zadataka, te organizira pripreme sjednice Skupštine, Upravnog odbora i ostalih organa Udruženja,
- brine se o izradi akata koje donosi Skupština i Upravni odbor Udruženja,
- obavlja konsultacije sa predsjednikom Udruženja i Upravnog odbora između sjednica Skupštine,

- vrši dogovaranje i razmjenu mišljenja o izvršavanju zadataka i poslova Udruženja, kao i o tekućim aktivnostima Udruženja,
- zastupa Udruženje u poslovima iz svoje nadležnosti i u dogovoru sa predsjednikom Udruženja,
- organizira administrativne poslove Udruženja,
- čuva pečat Udruženja i rukuje sa njim.

Izvršni direktor Udruženja za svoj rad odgovara Skupštini i Upravnom odboru Udruženja.

Sa izvršnim direktorom Udruženja Upravni odbor potpisuje ugovor o angažmanu, u kojem se preciziraju međusobni odnosi, odgovornosti i obveze.

VI. ZAVRŠNE ODREDBE

Članak 38.

Udruženje je dužno voditi poslovanje u skladu sa zakonskim propisima.

Na sjednicama tijela Udruženja vodi se zapisnik.

Zapisnik sa sjednica Skupštine i Upravnog odbora sastavlja zamjenik predsjednika, te je zadužen za njihovo čuvanje. Zapisnik ostalih tijela Udruženja sastavljaju predsjednici pojedinih tijela.

Izvršni direktor Udruženja brine se za osnovnu dokumentaciju Udruženja, a predsjednik svakog tijela za dokumentaciju nastalu u radu tog tijela. Po isteku mandata predsjednik pojedinog tijela dužan je predati dokumentaciju izvršnom direktoru.

Udruženje prestaje sa radom ako tako odluči Skupština Udruženja ili po odluci nadležnog državnog tijela, a u skladu sa Zakonom o Udruženjima.

Izmjene i dopune ovog Statuta usvaja Skupština.

Tumačenje odredaba ovog Statuta daje Skupština.

Ovaj Statut stupa na snagu danom donošenja na sjednici Skupštine, a primjenjivat će se od dana registracije Udruženja.

Na dan stupanja na snagu ovog statuta prestaje važiti statut Udruženja od 6. juna 2000. godine.

Br.: 1./2002.

PREDSJEDAVALJUĆI SKUPŠTINE:

Sarajevo, 2. marta 2002. godine

Filip Karadža